

Samarbeidsavtale om felles legevakt for kommunane Leikanger, Luster, Sogndal og Vik

1. Samarbeidspartar

Kommunane Leikanger, Luster, Sogndal og Vik samarbeider om felles legevakt, etter dette kalla Sogn legevakt. Samarbeidet blir organisert som eit administrativt vertskommunesamarbeid etter § 28 b i kommunelova, med Sogndal kommune som vertskommune.

Kommunane er positive til at andre kommunar kan slutta seg til ordninga på same vilkår som går fram av denne avtalen eller dei kan kjøpe tenester frå vertskommunen dersom dei ønskjer det. Samarbeidskommunane er kjent med at eit fleirtal på Stortinget har vedteke å slå saman kommunane Balestrand, Leikanger og Sogndal til ein kommune.

2. Føremål

Sogn legevakt skal sikre forsvarlege legevakttenester prega av kvalitet, tryggleik, tilgjengelegheit og service.

Sogn legevakt skal utføre desse oppgåvene:

- Interkommunal legevakt utanfor vanleg opningstid hjå fastlege/kommunal legevakt kl. 16.00 - 08.00 på kvardagar, samt heile døgnet i helg og høgtid.
- Ansvar for kommunale akutte døgnplassar (KAD-plassar) i Luster og Sogndal kl. 16.00 - 08.00 på kvardagar, samt heile døgnet i helg og høgtid.
- Sogn legevakt skal samarbeide med andre kommunale tenester, som heimesjukepleie, sjukeheim, psykisk helse og rus.
- Andre oppgåver kan leggest til Sogn legevakt

3. Organisering av tenesta

Vertskommunen organiserer tenesta. Tenesta blir organisert med;

- Legevakt i Sogndal, for kommunane Leikanger, Luster og Sogndal.
 - Lege i aktiv vakt til stades på legevaktstasjonen og tilgjengeleg for utrykking kl. 16.00 til kl. 08.00 på kvardagar og heile døgnet i helg og høgtid.
 - Kvalifisert hjelpepersonell (sjukepleiar) tilgjengeleg heile vakta.
- Legevakt i Vik
 - Lege i passiv heimevakt vakt kl. 16.00 til kl. 08.00 på kvardagar og i helg og høgtid.
 - Kvar 2. helg, fredag kl. 16.00 til mandag kl. 08.00 dekkja av lege frå Luster, Leikanger eller Sogndal. Desse legane er i aktiv vakt grunna reisetid til legevakt.

Vertskommunen gjer avtale med legane som deltek i vaktordninga.

Deltakarkommunane pliktar å dekke legevakter i samsvar med det tal fastlegeheimlar og turnuslegar som dei til ei kvar tid har. For tida er fordelinga slik;

Leikanger: 4
Luster: 8
Sogndal: 11
Vik: 4

Dersom ein kommune i ein periode ikkje kan stilla med legar i vaktordninga i samsvar med tal heimlar i kommunen og det utløyser behov for innleige av vikar, må dei kommunane som i denne perioden ikkje deltek med rett tal legar dekkja ein lik del av kostnadene ved vikarleiga.

Eventuelle søknader om vaktfritak vert handsama av legevaktleiar.

Det er ein intensjon om å etablere ei felles ordning for rekruttering av vikarar.

4. Samarbeidsorgan

4.1 Samarbeid

Det blir etablert eit administrativt og fagleg samarbeidsorgan samansett av to/tre representantar frå kommunane: Legevaktleiar, rådmenn, kommunalsjefar, kommuneoverlegar og tillitsvalde for legane. Føremålet med samarbeidsorganet er å sikre ei kvalitativ god teneste. Organet er rådgjevande. Sogn legevakt blir evaluert årleg i samarbeidsorganet på bakgrunn av årsrapport.

Det skal vera minst to møte i året, og elles dersom ein av samarbeidskommunane ber om det.

4.2 Legevaktsleiar

Det vert tilsett legevaktsleiar i vertskommunen. Vedkomande har ansvar for å organisere ei fagleg forsvarleg teneste, herunder:

- Naudsynte kompetansetiltak, m.a. opplæring av nye legevaktslegar og akuttmedisinsk trening
- Pasientjournalsystemet
- Utarbeiding og implementering av prosedyrar og retningslinjer, avvikssystem og klagehandsaming
- Praktisk organisering av legevakta, vaktlister
- Kontakt med samarbeidspartnarar, som t.d. Helse Førde og HELFO
- Utarbeide framlegg til budsjett og naudsynte rapportar, sjå pkt. 8.

5. Personale

Vertskommunen har arbeidsgjevaransvar for dei tilsette ved Sogn legevakt.

6. Budsjett og kostnader

Vertskommunen har budsjettansvar og utarbeidar eit samla budsjett for Sogn legevakt. Alle utgifter (lønn og sosiale utgifter, kontorutgifter, reise, kurs/opplæring, mv) vert budsjettert og rekneskapsført i Sogndal kommune. Kostnadane vert justert etter den årlege deflatoren i statsbudsjettet.

Alle utgiftene vert fordelt etter følgjande fordelingsnøkkel: 25 % likt og 75 % etter folketal. Vik kommune dekkjer kostnadene ved lege i aktiv vakt frå Luster, Leikanger eller Sogndal annakvar helg.

Kommunane får faktura og betaler inn akonto tre gonger i året, 1. februar, 1. juni (inkl. sluttavrekning frå året før) og 1. oktober.

8. Rapportering

Samarbeidskommunane skal få nødvendige rapportar frå vertskommunen for å rapportere i Kostra.

Vertskommunen skal utarbeide årlege rapportar som skal danne grunnlag for evaluering av drifta og samarbeidet mellom partane. Rapporteringa skal som eit minimum innehalde:

- produksjonstal
- rekneskap

9. Arkiv, IKT og fasilitetar

Sogndal kommune leverer arkivtenester for samarbeidet som stettar krav i arkivlova med forskrifter.

Kommunen og fastlegane inngår avtale om bruk av journalsystem på legevakt.

Vertskommunen stiller kontor, teknisk utstyr (telefon, PC mv), lisensar/tilgang til aktuelle datasystem og brukarhjelp og merkantile funksjonar til disposisjon.

Samarbeidskommunane stiller nødvendig tilgang til areal (skadestove m.v.) kostnadsfritt til disposisjon for Sogn legevakt ved behov.

Vertskommunen stiller opphaldsrom/kvilerom til disposisjon for lege i aktiv vakt.

10. Oppseiing

Avtalen gjeld frå 01.01.2018. Kvar kommune kan trekka seg ut av samarbeidet med eitt års varsel, likevel slik at oppseiing må skje innan 31.12. for oppseiing frå neste årsskiftet.

11. Tvistar

Dersom det oppstår ein tvist mellom partane om tolkinga av denne avtalen skal tvisten først søkjast løyst ved tingingar. Fører tingingane ikkje fram innan 2 månader, kan tvisten avgjerast av ei valdgiftsnemnd med ein representant frå kvar av kommunane og Fylkesmannen i Sogn og Fjordane som nøytral leiar av nemnda. Elles gjeld reglane i lov 14.5.2004 nr 25 om valdgift.

Sogndal,

Jarle Skartun
Rådmann Luster kommune

Odd Arve Rakstad
Rådmann Leikanger kommune

Oddbjørn Ese
Rådmann Vik kommune

Jostein Aanestad
Rådmann Sogndal kommune